

Humeso wa Vuhangalasamahungu

Holobye wa Timali na Khomixinara wa SARS va endzela eAlberton ku xopaxopa xiyimo xo lulamela Nguva yo Fayila ya 2025

7 Mawuwani 2025 – Ttn Enoch Godongwana, Holobye wa Timali na Ttn Edward Kieswetter, Khomixinara wa SARS, namuntlha va endzerile *Alberton Taxpayer Service Centre* ya SARS ku xopaxopa xiyimo xa yona xo lulamela tanihileswi Mihlahluvo leyi Tiendlekelaka yi sungulaka, ku sukela hi ti 7 ku fikela ti 20 Mawuwani 2025.

Holobye Godongwana na Khomixinara Kieswetter va burisanile na vahakelaxibalo, vo tala va vona a va endzerile tihofisi ku engetela leswintshwa no tiyisisa vuxokoxoko lebyi tsarisiweke, ku katsa no cinca tiimeyili, vuxokoxoko bya le bangi na tinomboro ta selifoni. Vahakelaxibalo van'wana a va endzerile rhavi ku ya lulamisa timhaka leti xakelanaka na swikweleti swa xibalo leswi kayiveleke na mitlheriso.

SARS yi sungurile ku humesa **Mihlahluvo leyi Tiendlekelaka** eka vahakelaxibalo lava timhaka ta vona ta xibalo ti nga nonohiki ngopfu. Loko vahakelaxibalo va pfumelelana na Mihlahluvo leyi tiendlekelaka, a ku laveki xiendlo xin'wana ku suka eka vona. Ku amukela i ndlela leyi tiendlekelaka, vahakelaxibalo a va fanelangi ku amukela Nhlahluvo lowu Tiendlekelaka hi ndlela ya manyuwali. Vahakelaxibalo va tsundzuxiwa ku rindzela xitiviso xa SMS/imeyili va nga si nghena eka eFiling kumbe SARS MobiApp.

Mivuyiselo ya le hansi ka R100 leyi kolotiwaka vahakelaxibalo yi ta hakeriwa hi ndlela leyi tiendlekelaka eka tiakhawunti ta vona ta le bangi eka tiawara ta 72 endzhakukaloko nhlahluvo wu hetisiwile.

Nguva yo Fayila ya 2025 yi pfula eka **vahakelaxibalo lava nga riki va nkarhinyana na va nkarhinyana lava nga hlahluviwangiki hi ndlela leyi tiendlekelaka**. Nkarhi wo fayila eka vahakelaxibalo lava nga riki va nkarhinyana i ku sukela hi ti 21 Mawuwani ku fikela ti 20 Nhlangua 2025. Nkarhi wo fayila wa vahakelaxibalo va nkarhinyana wu ta pfala hi ti 19 Sunguti 2026.

Masiku lama landzelaka ma fanele ku tekeriwa enhlokweni mayelana na Nguva yo Fayila ya lembe leri:

- **Ku humesiwa ka Switiviso swa nhlahluvo hi ndlela leyi tiendlekelaka:** 7 – 20 Mawuwani 2025
- **Vahakelaxibalo vona vini (lava nga riki va nkarhinyana):** 21 Mawuwani – 20 Nhlangua 2025
- **Vahakelaxibalo va nkarhinyana:** 21 Mawuwani 2025 – 19 Sunguti 2026

Vahakelaxibalo va hlohloteriwa ku tivonela swinene no hlayisa vuxokoxoko bya vona byi va xihundla. Loko ka ha yiwa eka Nguva yo Fayila, ku ta va na miringeto yo tala ku suka eka swikemara ku xisa vahakelaxibalo. Swikemara swi nga tiendla vatirhi va SARS ku yiva vuxokoxoko bya munhu, ku va endla va tllika tilinki, kumbe ku hakela mali eka akhawunti. SARS yi nge ku kombeli muhakelaxibalo ku tirhisa linki yihi na yihi. Vahakelaxibalo va fanele ku sirhelela vuxokoxoko bya vona byo nghena bya eFiling no tirhisa vativi va swa xibalo.

Vuxokoxoko bya sweswinyana bya mayelana na swikeme byi nga kumiwa eka webusayiti ya SARS: www.sars.gov.za. Ku mangala kumbe ku kombela vuxokoxoko eka vunjoverti, vahakelaxibalo va nga rhumela imeyili eka phishing@sars.gov.za.

Ku papalata mixupulo, vahakelaxibalo va nga rhumela vuxokoxoko byo lulama xikan'wekan'we. Mayelana na Nguva yo Fayila ya 2025 yo olova no famba kahle, vahakelaxibalo va hlohloteriwa ku tirhisa tichanele ta vuhlanganisi leti landzelaka na SARS:

- **Webusayiti ya SARS:** endzela www.sars.gov.za no tllika eka thebe ya "Individuals".
- **SARS Online Query System (SOQS):** <https://tools.sars.gov.za/soqs>.
- **SARS WhatsApp:** rhumela "Hi" kumbe "Hello" eka 0800 117 277.
- **Xipfuneti xa Vhichuwali xa AI:** xa kumeka 24/7 eka webusayiti ya SARS ku hlamula swivutiso.
- **Photosa *134*7277#:** ku fikelela vukorhokeri bya SARS.
- **SARS YouTube:** endzela @sarstax mayelana na tivhidiyo ta swi endliwa njhani.

A wu fanelangi ku endzela rhavi ra SARS. Loko swi fanerile, buka xitshembisano ku papalata tilayeni to leha.

Holobye Godongwana u humesile ku enerisiwa ka yena mayelana na xiyimo xo lulamela xa SARS ku phakela Nguva yo Fayila yo olova no humelela eka vahakelaxibalo. Khomixinara Kieswetter u hlohloterile vahakelaxibalo ku tirhisa tichanele ta xidijitali ta SARS ku burisana na nhlango. U vurile leswaku "vahakelaxibalo a va fanelangi ku tipaluxa eka swiyimo swa maxelo lama ma xirhami no yima etilayenini. Va nga endla timhaka ta vona ta xibalo va tigidlile emakaya ma vona handle ko hakela timali to khandziya tithekisi".

Mayelana na vuxokoxoko hi xitalo, u komberiwa ku tihlanganisa na SARSMedia@sars.gov.za

07 MAWUWANI 2025: HOLOBYE WA TIMALI NA KHOMIXINARA WA SARS VA ENDZELA EALBERTON KU XOPAXOPA XIYIMO XO LULAMELA XA NGUVA YO FAYILA YA 2025



Xifaniso xa 1: Murhangeri wa SARS Alberton Taxpayer Service Centre - Jenny Kotze, Khomixinara wa SARS Kieswetter na Holobywa wa Timali Godongwana

